



永遠毋放棄

顏銘志

是啥物款的原因予一个自三歲就半遂的查某囡仔，毋管好天抑歹天，逐工對臺中騎機車到彰化練習健力。敢講是受人強迫，抑是有足大的利益？攏毋是！是一份欲證明家己存在的志氣，予伊忍受淋雨曝日的困苦恰稀微，猶原堅心不移，永遠毋放棄。

年初，學校佇善心人士的幫贊下，邀請著咱臺灣六屆帕運¹健力國手，嘛是得著 2021 年總統教育獎的林亞璇小姐，專工對臺中坐高鐵落來高雄，恰阮學校的囡仔分享伊性命的歷程。伊坐佇輪椅，喙笑目笑恰逐家相借問了後，就沓沓仔講起伊充滿鹹酸苦澁的人生。

頭起先講著細漢讀冊的時陣，因為坐輪椅無法度上遊覽車，逐擺校外教學攏干焦會當請假佇厝，所以就下願，大漢以後欲環遊世界，四界去迤迤。繼落來講起從高中開始加入健力社團，出社會食頭路三冬，有機緣閣轉去學校專心訓練健力。為著每月日的所費，捌踎工廠做散工，將貼紙貼佇物件頂懸，貼一个趁三仙錢。雖然趁小錢，毋過「加減趁，較袂散；加減拈，就免借。」落尾講著出國比賽，伊有當時仔會佇上重要的時陣失敗，復健師共講健力愛靠手力恰腰力，因為伊龍骨著傷，無法度靠腰的力，所

以練到遮已經盡磅矣，永遠無可能會著頭名！

比賽輸去閣聽著這種話，予伊那想那流目屎。毋過伊毋願按呢就放棄，顛倒閣較拍拈訓練，共食苦當做食補。因為伊知影，肯想就有步，肯行就有路。毋驚比賽吊車尾，只驚永遠無機會。伊講甲誠輕鬆，我聽甲真沉重。想講這款代誌假使發生佇家己身上，敢會像伊遐爾勇敢、遐爾堅強？當咧思考這個問題的時，坐佇身邊的同事輕聲細說講，本成猶閣咧煩惱五、六年的囡仔敢坐會牢，想袂到逐家攏聽甲耳仔覆覆，親像會當感受著林小姐彼種拍斷手骨顛倒勇、永遠毋放棄的精神。

是啊，就像咱咧教育學生仝款，準做個預顛、狡怪，咱嘛是愛有耐性，勻勻仔共個開破、教示，永遠毋通放棄。

¹帕運(Phà-ūn)



阿母的拷頭糜

蔡月賓

爸母作穡，逐工天貓霧仔光就起床，早頓扒扒食食咧，隨去田裡種作，等到十點外，日頭赤焱焱才轉來厝款中晝。以早大口灶，生活歹過，干焦知影通拚，無佻濟歇暍的時間，嘛無四秀仔通食，就愛早頓推予飽飽。

阿母上勢煮拷頭糜，煎幾粒仔卵，攢醬菜抑是肉酥、魚脯仔閣一兩盤青菜，一人一暍仔就會當囫三四碗。用灶煮一生鍋的糜，無佻久就貼底矣。會記得我讀國中的時陣，五點外就愛出門，四點外，灶趲就光焱焱，嘛有敲卵炒菜的聲。阿母攏會煮一坵燒滾滾的糜，先斟一碗公園佇邊仔予冷，通予我先食，閣有伊攢的物配，予我有飽足的元氣，會當對透早上課擋到中晝。

高中到市區讀冊，才知影別人的早頓是包仔、饅頭、卵餅、燒餅、油炸粿和菜頭粿。蹠外口，為著方便，就綴人開始食遐的較奇巧的早頓。頭仔興興，食無幾頓了後，煞開始懷念阿母煮的拷頭糜予阮的飽足恰清甜的芳味。

有一改歇暍日，看著阿母的早頓是前一暗晷的菜，恰一大碗公的白飯做伙落去燻，家己一人恬恬仔坐佇八仙桌的椅條，那扒飯那沓沓仔哺。阿母慢慢仔食，親像咧享受大餐廳的腥臊，共看著白泔無味的菜誠細膩送入去伊的腹

肚內。阿母足儉，共透早上鮮的、燒烙的早頓留予阮遮的囡仔，伊煞逐早仔窮菜尾。

阿母講伊細漢的時陣，厝裡散赤頭喙閣濟，逐頓攏是番薯簽，罕得食著飯。若看著別人食白米飯，伊就佇邊仔癮甲偷偷仔流喙瀾，用手腕拭都拭袂離。伊講會當三頓有飯、有糜，是嫁阿爸綴咧種作了後才有的幸福。

毋管是用灶燃柴的，抑是瓦斯爐¹煨的，阿母的拷頭糜就是有一種醇厚的粟仔芳。

雖罔家己嘛常在煮糜，毋過就是無阿母煮拷頭糜的工夫。不而過，若食著泔糜仔，就會無張持一碗閣一碗，因為每一喙，攏予我飽溲的氣力，嘛予我想起阿爸、阿母的拍拚、勤儉恰對阮的愛。

¹瓦斯爐(gá-suh-lôo/gá-sir-lôo)



海龜的悲歌

尤靜怡

曠闊的大海，除了海水，你感覺應該猶有啥物咧？是真濟真濟的魚仔、海草和珊瑚咧？毋過人類去海邊仔耍，烏白共糞埤擲佇海沙埔，聽候海湧來的時陣，遮的塑膠矸仔、塑膠袋仔、軟管、攞仔……五花十色的塑膠糞埤就攏予海湧掃入去大海，就按呢大海煞親像是一鼎濁濁的糞埤湯。

本底我是一隻平凡甲無法度閣較平凡的海龜，我佇中南美洲的海域大漢。這搭的日頭真燒烙，海水嘛足溫暖，照講逐工佇遮生活應該是不止仔快活才著，毋過環境的汙染閣加上後來的一層代誌，煞予我成做一隻全世界通人知的海龜。

自細漢我就生活佇海裡，毋捌塑膠類的糞埤，嘛毋知彼袂食得。大跤閣嬌嬌的塑膠袋仔，阮攏共當做是海蛇，喙開開就共欲落去。啥人知影，食落去就吐袂出來矣！塑膠袋仔一直佇胃內底，無法度通消化，害我不時都感覺腹肚滯滯，真正是痛苦無人知。

閣較悽慘的是，阮後來閣共一枝軟管當做是細尾魚仔，食落去了後，當我咧翻草的時陣，彼枝軟管煞撞入去我的鼻空內底，害我疼甲哀爸叫母。毋過敢有人聽會著我的哭

聲咧？我規暝規日疼袂煞，我干焦會當擰頭看天，拜託天公伯仔愛來救我。好佳哉！天公伯仔真靈聖。有一工我去予研究海龜的人掠著，個看著我的鼻空有物仔，就趕緊用夾仔欲替我共夾出來。咧夾的時陣實在是有夠疼的疼。我喙齒根咬咧，目屎直直津落來，鼻空血嘛綴咧流，尾仔總算是共軟管夾出來矣。個閣共我抹藥仔，等我較好了後，才共我放倒轉去大海。

我予人夾軟管的過程有拍做影片，閣鋪上網路。真濟人看了，心內真毋甘，才開始意識著塑膠軟管對海洋生物的危害，真濟有心的人嘛開始宣導毋通閣用塑膠軟管矣，閣有袂少人呼籲愛減用塑膠袋仔，毋通閣製造遐爾濟塑膠糞埤矣。聽著遮的代誌，我心內感覺真安慰。我向望我是全世界上尾一隻受害的海龜，嘛向望大海會當變甲清清氣氣，予阮會得通繼續快快樂樂生活佇海裡。